

7. fundur aðalstjórnar Vestra árið 2020

Fundur á heimili formanns að Smiðjugötu 7, þriðjudaginn 25. ágúst 2020, kl. 17:30.

Mætt voru: Guðfinna Hreiðarsdóttir, Guðni Guðnason, Hlynur Reynisson, Jóna Lind Kristjánsdóttir, Sólrún Geirsdóttir.

1. Covid. KSÍ – reglur um sóttvarnir. Formaður greindi frá því að hún hefði fundað með forráðamönnum meistaraflokks knattspyrnudeildarinnar til að fara yfir reglur um sóttvarnir sem þarf að framfylgja til að hægt sé að halda Íslandsmótinu áfram. Reglurnar virtust við fyrstu sýn vera erfiðar í framkvæmd en við nánari yfirlegu viðráðanlegar þótt ýmislegt sé flókið í framkvæmd og krefst meira vinnuframlags. Ekki var í fyrstu ljóst hvort áhorfendur yrði leyfðir á leikjum en svo fór að þeir voru bannaðir sem er ákveðið tekjutap en einfaldar um leið framkvæmd leikja. Reglugerð KSÍ verður fyrirmynd fyrir önnur sérsambönd og er KKÍ þegar búið að setja fram svipuð drög að sóttvarnareglum. Tímabilið í knattspyrnu lengist til 17. október sem getur mögulega valdið árekstrum við mót og leiki annarra deilda og félaga á Torfnesi, sérsaklega þar sem sóttvarnareglurnar lengja tímann við leikja- og mótahald. Halda þarf formannafund sem fyrst til að fyrirbyggja að það komi til árekstra og deildirnar nái að skipuleggja leiki og mót í samráði við hver aðra. Í framhaldinu þarf að skoða handboltann og aðrar íþróttagreinar sem hafa aðstöðu á Torfnesi í samráði við HSV.

2. Knattspyrnuvöllurinn á Torfnesi. Ástand knattspyrnuvallarins hefur ekki verið nógu gott í sumar, mikið kal sem seint gekk að laga. Forráðamenn knattspyrnudeildarinn voru mjög ósáttir við hvernig staðið var að undirbúningi og umhirðu vallarins og komu á framfæri athugasemdum við forstöðumann íþróttamannvirkja Ísafjarðarbæjar og sviðstjóra skóla- og tómstundasviðs. Gekk ýmislegt á í þeim samskiptum og ljóst að fara þarf yfir þessi mál í vetur þannig að þau verði í betra horfi næsta sumar. Síðasta vetur sendi knattspyrnudeildin inn formlegt erindi til íþrótt- og tómstundanefndar þar sem deildin óskaði eftir að taka að sér rekstur knattspyrnuvallar á Torfnesi sumarið 2020. Nefndin hafnaði beiðninni og lagði til að farið yrði í frekari vinnu að lausn að bættu verklagi og samstarfi Ísafjarðarbæjar og knattspyrnudeildarinnar. Þeirri vinnu er augljóslega alls ekki lokið.

Formaður greindi jafnframt frá máli sem hefði komið upp varðandi girðingu sem reglugerð KSÍ gerir kröfu um til að völlurinn sé löglegur. Það er nokkrum erfiðleikum bundið að setja girðingu norðanmegin á vellinum þar sem körfuboltavöllurinn liggur nálægt knattspyrnuvellinum. Niðurstaðan var sú að girðingin yrði tímabundið sett á körfuboltavöllinn en það gefur auga leið að það þarf að fjarlægja hana á milli leikja svo hægt sé að nota völlinn. Nokkur ágreiningur hefur verið um hver ætti að sjá um að færa girðinguna sem er fyrirferðarmikil og þung. Knattspyrnudeildin hefur litið svo á að hún væri hluti af íþróttamannvirkinu og þar af leiðandi ætti bærinn að sjá um að færa hana og skaffa þau tæki sem þarf til þess en á móti hefur bærinn sagt að þetta væri hluti af frágangi eftir leik. Ljóst er að þegar ákveðið var að leysa vandann með þessari girðingu þá hefði verkaskipting þurft að vera skýr hvað þetta varðar. Er verið að skoða hvernig leysa megi þennan hnút og væntanlega næst sátt um að það verði gert með annarri girðingu sem ekki þarf að færa.

3. Samstarfssamningur/verkefnasamningur og uppbyggingarsamningar.

Samstarfssamningur HSV við Ísafjarðarbæ rann út í árslok 2019. Í gildi er bráðabirgðasamningur til eins árs. Stjórn HSV og íþrótt- og tómstundanefnd eru að vinna nýjan samning og er vonandi að aðildarfélög HSV fái drögin til yfirlestrar áður en þau eru undirrituð þannig að þau hafi tækifæri til að koma með athugasemdir. Ekki er nóg að fá hann sendan eftir undirritun til kynningar. Það þarf að yfirfara verkefnasamninga og sjá til að þess að verkefnin séu vel skilgreind og skýrt afmörkuð, sérstaklega er nauðsynlegt að endurskoða verkefnasamning knattspyrnu deildarinnar hvað varðar umsjón með knattspyrnuvellinum á Torfnesi. Einnig er þörf á að yfirfara uppbyggingarsamninga, t.d. þann sem snýr að vallarhúsinu á Torfnesi en þar á tilteknum framkvæmdum að vera lokið í nóvember til að greiðsla fái st. Er þegar búið að leggja út í talsverðan kostnað þar og um að gera að klára þær skýrslur sem þarf til að ná inn fyrir útlögðum kostnaði. Hlynur tók að sér að tala við þá sem komu að framkvæmdum og sjá hvernig staðan er.

4. Bréf um leiguskuld við HSV vegna íbúða. Á dögnum barst erindi frá HSV þar sem gerð var grein fyrir því að Vestri skuldar rúma eina milljón vegna leigu íbúðum fyrir þjálfara og leikmenn deilda félagsins en þegar er félagið búið að greiða rúmar 4 mkr í leigu árið 2019. Styrkur Ísafjarðarbæjar í framlagi á íbúðum hefur minnkað síðustu ár í kjölfar aukinnar eftirspurnar eftir leiguhúsnæði á svæðinu. Tekjur vegna lóttó og bæjarstyrkjar duga ekki til að greiða fyrir íbúðaafnot sem hafa vaxið verulega, amk í kostnaði, samningur hljóðar upp á 5 íbúðir en hreyfingin er með mun fleiri íbúðir sem þarf þá að greiða markaðsverð fyrir. Kostnaður 2019 vegna íbúða er um 5 m.kr en tekjur um 4 m.kr og skuld Vestra við HSV því um 1 m.kr. Leggur HSV til að greiðslur vegna verkefnasamninga fari upp í þessa skuld en bera þarf það undir formenn deilda.

5. Fjárhagsstaða deilda. Stjórn Körfuknattleiksdeildar Vestra sendi bæjarstjóra, sviðstjóra, formanni bæjarráðs og framkvæmdastjóra HSV erindi þar sem gerð var grein fyrir erfiðri fjárhagsstöðu deildarinnar vegna Covids og tekjutaps sem deildin hefði orðið fyrir af þeim sökum, einkum og sér í lagi þar sem ekki reyndist unnt að halda körfuboltaþúðirnar sem hafa verið stærsta fjáröflun deildarinnar og haldið uppi starfi yngri flokkanna. Formaður deildarinnar, Ingólfur Þorleifsson, var boðaður á fund bæjarráðs mánudaginn 24. ágúst og mætti þar ásamt formanni og gjaldkera aðalstjórnar Vestra. Var farið yfir málin þar og ljóst að fleiri deildir og aðildarfélög HSV eru í svipuðum sporum. Innan bæjarins virðist vera skilningur á þessari stöðu og þrátt fyrir að staða bæjarsjóðs sé erfið um þessar mundir eru vonir bundnar við að hægt verði að styrkja félögin með einhverjum hætti.

Aðeins rétt um sértæki styrkinn sem hægt var að sækja um vegna Covid.

Umsóknarferlið var flókið og tímafrekt og óvíst hvort einhverjar deildir sóttu um.

Umsóknarfrestur þar er löngu útrunninn en þegar umsóknarferlið var í gangi þá var útlit fyrir að knattspyrnusumarið yrði nokkuð hefðbundið og körfuboltaþúðirnar voru enn á dagskrá með breyttri tímasetningu. Þetta átti svo eftir að breytast sem kunnugt er.

6. Innheimta félagsgjalda. Gjaldkerfi upplýsti að um 200 manns væru búnir að borga, 700 seðlar væru ógreiddir og styttist í eindaga. Einhver óánægja varð meðal þeirra sem fengu senda kröfu en tiltölulega fáir höfðu samband og óskuðu eftir að krafan yrði felld niður. Ekki er búið að taka ákvörðun um hvort þeir sem ekki greiða verða strikaðir út af listanum eða send áminning.

7. Boðun formannafundar: Aðalstjórn Vestra og formenn deilda þurfa að funda sem fyrst. Guðfinna finnur heppilegan dag í næstu viku til þess. Umræðuefni: Kynna Covid-viðbrögð. Fjárhagsstaða deilda og endurskoðun allra samninga fyrir áramót.

Önnur mál: Guðfinna kom með þá hugmynd að fá einhvern til að semja lag fyrir Vestra, eitthvað gott og grípandi. Fundarmenn tóku vel í þá hugmynd og voru ýmis nöfn á lofti enda margir hæfileikaríkir og flottir tónlistarmenn tengdir svæðinu.

Fleira ekki gert og fundi slitið um kl. 19.